


襄陽府志



襄陽府志序



周禮春官有小史掌邦國
之志謂諸侯之國誌其土
地風俗物產貢賦之書以
獻於王小史掌之此後世
郡縣志乘所自昉也

襄陽府志

序

聖朝重熙累洽百有餘年來邦
國之戶口日益殷繁政教
之覃敷日益淪浹於是守
土之有司各舉其郡邑中

古往今來大綱細目條分
縷析釐而彙列於編以備
太史氏之採擇故雖山陬
僻邑咸著有成書上以徵
朝廷治化之隆下以著民俗淳

龐之厚典綦重矣襄郡有
志一修於順治壬辰再修
於康熙壬子今又八十餘
年而錢塘白崖陳君來爲
郡守悼前志之舛訛歎文

獻之無徵公餘之暇卽以纂修爲已任蓋諮訪者有年討論者有年而後開局編次再閱歲而書成凡郡中沿革山川田賦井里以

及聲名文物之所關莫不旁搜遠紹鉅細畢舉其所以鑒往轍而昭法戒者尤諄諄三致意焉稿甫就請予序其簡端披閱匝月深


服其考訂之精詳衡論之
諦當而析疑辨誤詳審周
密實爲古今志乘中所不
易多覲君固東南名宿往
與予同列郊署復與予共

蒞襄土六七年來百廢具
舉民物安樂幸得藉君以
寡愆尤今親見君諮詢於
故老之慇懃搜羅於載籍
之富有而甚樂其相與有

成也雍正間前副使韋堂
魯君嘗彙輯安襄鄖三郡
志事合成一書志板存道
庫中今得是書以叅觀雖
詳畧各異其宜固亦前賢
所默許爲同心者矣爰書
以爲之序

乾隆二十四年歲次己卯冬
月穀旦分守安襄鄖道東

雍李敏學撰



襄陽府志

序

六

重修府志序

東漢建安中割南郡編
縣之北及南陽之山都
立襄陽郡初治宜城未
幾移治襄陽惟時郡境
北界漢水西界萬山晉

則西北益以鄧城隋則
又西益以穀城陰城元
則均房棗陽俱來屬明
成化中割鄖房四縣立
鄖陽府今郡所統凡一
州六縣焉漢末三國分

爭莫不以襄陽為扼要
而力圖之蓋地据荆郢
之上游為宛洛之門戶
自古稱為雄郡然古今
郡縣或因時會而易其
名或因地利而徙其所

惟襄郡自魏晉以降名
莫與更城莫遷改宇內
最古之郡亦莫襄陽若
矣夫郡各有志制也聿
稽往古晉習鑿齒輯襄
陽耆舊傳郭仲產輯襄

陽記梁鮑至輯南雍州
記唐吳從政輯襄沔記
盧求輯襄陽故事至宋
而郡守高夔命教授劉
宗編纂襄陽志四十卷
最稱詳脩明御史曹璘

繼修襄陽府志二十卷
遺編雖富僅存其名時
時附見於他書所援引
而全本終不可見今舊
志之存者惟明萬歷初
郡守吳道邇及

本朝順治間都御史趙兆麟康熙中知府杜養性所修三書耳按吳守志甫成書即遷擢去越五年繼守命訓導高可作修補高跋云頗有殘缺

遺恨趙撫當軍務倥傯之際削平殘孽亟舉斯典誠為勝事惜其時操觚者文筆澁滯而考據亦未精詳若杜守則抄錄趙志以應

詔旨所徵不足云修也相沿
及今又八十餘年矣是
他郡之修志皆為因而
今日之修襄陽府志則
幾同於創此余所以延
需歲月久而始成是編

耳余以壬申歲奉

聖天子命來守是邦蒞任之
初方冀徵諸舊志以求
從政所宜乃反覆詳閱
不禁慨然編纂之任固
非守土者所得他諉而

未遑也越明年始得於
公餘之暇留心採訪而
郡中文獻無徵不敢易
言修舉爰搜羅於典籍
所紀載諮詢於故老之
傳聞歷有年所彙萃成

編為若干卷卷中所列
要皆依擬確鑿既不敢
勦襲陳言不知訂正尤
不敢獨憑臆見妄斥前
非凡山川名物之源流
有可叅校不憚煩辭而

宦蹟者舊之幽潛有可
徵信不遺鉅細第願雖
奢而學識未充志雖慤
而聞見多疎良自愧耳
考襄陽冠蓋之盛已著
於漢時魏晉而後名賢

輩出自今觀之恒不古
若匪惟襄之人士不克
追踪於往哲亦教養之
未周化導之未至其責
端在有司余不敏用是
以自勉庶不負

朝廷之使任而與此邦人士
共沐

邳隆之化理不亦休哉是為
之序

乾隆二十有五年歲次
庚辰仲春月朔

襄陽府志

序

八

賜進士出身知襄陽府事加
七級錢塘陳鶚撰



襄陽府志凡例

志必有目區類編纂史例也然門類太繁則失體例況於
一目中復多畛域如舊志於宦蹟則分以時代又分各
邑於藝文則分時分邑而又分體斯治絲而棼之矣夫
郡志以各邑事跡薈萃成書有不得不分者疆域山川
古蹟賦役里社之類是也外此則宜從合茲志列目二
十有四可以類從者併入之疆域之下形勢附焉里社
之下市鎮關梁附焉學校之下書院附焉古蹟之下陵
墓附焉官署之下公廨附焉壇廟之下寺觀附焉賦役

襄陽府志

凡例

一

之下積貯附焉兵衛之下驛鋪附焉分合庶免固陋不
致爲通人所鄙

志乘惟地理爲難而襄郡尤甚蓋古今名號數易出入不
同况襄自晉世僑置郡縣沿及五代朝改夕更卽隋唐
地理志已莫能詳悉其建置矣然與其影響傳會以誤
後人何如闕其所不知者爲當也歐陽文忠公云疑以
傳疑則信者信矣舊志沿革譌舛尤多今爲一一覈正
而其中建置未詳年代無考者於沿革之外著附考以
備稽覈宋書地理志於僑置郡縣頗爲清晰茲并附錄

於後庶於郡地不致混淆耳

地之有山川猶人之有眷目不爲之標舉疏剔同於混沌之不鑿矣從前諸志山不著其脈絡水不辨其源流僅列其名未置一語使山川有靈能無齒冷夫漢沔稱雄峴荆著異載筆者縱未能探幽涉險窮寫其勝槩而顧忍概置弗道等之蹄涔土阜乎茲則巨細崇卑咸開生面覽者可以臥游聞者亦如親履嘉惠後人良多矣

太和名勝不可殫述前已別有成書茲第舉其大概至於漢水經流數千餘里而居郡境者什有其四旣以其所

襄陽府志

凡例

二

歷之地分載州縣中復詳考水經著其古今異同之迹作襄郡漢水經流考一篇附於卷末

襄陽古蹟流傳最多而歷年久遠往往爲他處假借以致彼據此爭紛紜聚訟如仲宣之樓武侯之宅其在襄土確有據依正毋庸辨而自明者也若孟亭楚平王墓實在他郡不敢仍舊志而不爲訂正其他跡涉疑似者不一而足意見所及輒爲疏解非曰好辨蓋不欲以鶻突爲了事耳

志裨於政非虛語也其井里之盈耗賦役之增減學校壇